

Biografia di Victor Nicolaas Camacho

Victor Nicolaas Camacho, a nace na Savaneta, Aruba, dia 23 di December 1950, net dos dia prome cu Pasco. Victor ta e “kerstkind” cu a drenta cas na Savaneta. Su number di cariño ta Tol cu a bini di Victol. Tempo e tabata chikito e no por a bisa Victor, anto e ta yama su mes Tol y tur hende tabata yam’e Tol. Dia el a bira mas grandi cu el a toca na varios caminda, nan ta yam’e diferente “Victor con veinte dedos”, of nan ta yama “Victor the psychic pianist.” Number di Victor su mama ta Juliana de Mey, naci na 1919, su tata ta Matias Camacho kende a nace na Adicora na Venezuela na maart 1917. Pero di tempo cu e ta baby el a bin biba na Aruba. Victor su lombrishi ta dera na Savaneta manera el a bisa caba. Tur a nace na cas, solamente su ruman homber mas chikito a nace na hospital. Victor tin cuatro ruman muhe mas grandi y e ta di dos ruman homber y ainda e tin un ruman homber mas chikito, kiermen nan tabata shete ruman. E ta casa cu Hedy Hartog de Cuba. Nan a casa casi cuarenta aña pasa dia 23 di november 1979. Fecha di nacemento di Hedy ta 14 di november 1960. Nan tin dos yiu muhe y un yiu homber. Stephanie a nace dia 15 di januari 1982, despues a nace Daniel dia 5 di februari 1984, esun di mas chikito Stacey, a nace dia 16 di september 1988. Victor sigur tin mas musico den famia. Su tata ta un gran musico e tempo aya na Savaneta y e tabatin su banda caba. Victor su mama tabata canta riba coro y su ruman muhe Rina a toca piano. Pues, nan tabatin e piano na cas caba prome cu Victor a nace. For di baby caba ya Victor ta mors riba e piano, anto ta Rina ta dun’e les e tempo ey. Su rumannan homber Rafi y Freddy tambe ta musico, y naturalmente su yiunan tambe. Stephanie ta toca piano y Daniel tambe a bay les di piano na Aruba, despues el a sigui den percusion y e ta activo como musico na Hulanda. Victor su subrino kende ta Johnny Scharbaay, tambe ta pianista. Di chikito caba ya Victor a coach Johnny, ora e ta mustre e algun cos riba piano. Johnny su ruman homber Gregory, tambe ta percusionista y e ta toca den banda.



Segun Victor e bida artistico y tur etapa den bo bida ta diferente

Segun Victor, e no ta un cambio den bida door cu tur etapa den bo bida ta diferente. Prome cu nan a casa, su suegra ta bisa (adverti!) su señora, cu e ta bay casa cu un artista, e ta bay casa cu un pianista, pues pa e sa cu Victor tin su tocamento. Anto for e di e dia ey, Victor su señora semper a apoy’e. Victor a bis’e cu si e bay traha un cantica aworaki e no ta traha “one in a million”, pero e ta traha “one in a billion!” Semper Hedy a apoya Victor y semper el a dun’e un compliment. Nan ta na cas tin biaha ta train, anto e señora ta bisa Victor cu e cantica ey ta zona hopi bunita. Anto e guestnan tambe ta sintie esey tin biaha, ora Victor ta toca na hotel.

E bida artistico

Ya for di baby caba Victor ta toca piano. Cu 5 aña caba e ta mors riba e piano, anto su ruman muhe Rina tabata haya les di piano cu diescincu aña. Rina ta toca piano cu partitura, anto Victor ta sinta na banda, loco pa toca tambe. Victor ta lag’e caba, anto e ora e ta bay toca tur cos fo’i cabes. Fo’i chikito caba, ya Victor ta memorisa e melodianan y toca nan fo’i cabes. Pero despues Victor a studia un tikimusic door di su ruman muhe

Rina. Carmen de Kort tambe tabata un organista di misa di Savaneta. Carmen a siña Victor un poco tempo y despues, e mes a sigui siña hopi cos tambe. Ta door di bukinan, na un forma auto didacto e ta siña su cosnan. Despues Victor a bay Hulanda, pero el a bay studia otro cos cu no ta musica. Mientras e ta na Hulanda, el a tuma su tempo liber su tempo liber pa studia piano tambe. E ta corda cu e tabata haya

les priva di un meneer di conservatorio. Nan a bay den prome buki y Victor kier a start na comienso pa asina e por domina e lesamento. E maestro di no, nan ta bay cu e di tres buki! No, e ta mucho facil, ban cu e di cinco buki. Asina nan ta skip buki tras di otro, te ora bo ta yega un cierto nivel y e ta bisa bo:” Victor, je bent klaar voor het toelatingsexamen voor het conservatorium!” Victor tabata

toca su “études” caba, pero como cu e ta studia e tempo ey pa medisich analist y despues biochemie, ya e mester a regresa Aruba. Como cu Victor tabatin beca pa studia (studiebeurs) y e obligacion pa bolbe Aruba, e ora e no por a drenta conservatorio. Pero na Aruba, Victor a sigui haya su lesnan di Armando Lorenzini, un Argentino, Ricardo Garcia, Johnny Croes tambe y cerca Johnny Scharbaay. Esey ta su maestronan di piano pa e por a siña e teoria y haya experiencia practico.



Victor Camacho kier logra e dominio riba su lesamento



Victor Camacho no ta pianista solamente pero e ta tune y repara piano

Dedicacion y estilo musical

Naturalmente tabata e piano cu semper Victor ta caricia. Fuera di piano, Victor ta toca cuatro, guitarra, flauta, ritmo y steelband tambe, pasobra den aña sesenta di siglo pasa, ta nan mes a traha barinan di steelband. Rafi, su ruman grandi, a motiva Victor hopi mes tambe. Anto nan dos ta traha e instrumentnan manera punch e barinan, nan ta kima nan den cunucu. Prome haci nan hundo, despues nan ta punchnan, anto Victor ta esun cu tin cu stem e.

E tempo ey, Victor no tabata “tune” piano ainda, aworaki si. E tempo ey, nan ta laga hende tune nan piano paden di e cas, anto Victor ta bay cu e bari paden pa stem cada tono di steelband. Cu e steelband, nan a traha un set completo y nan a toca den Carnaval. Rafi ta toca first pan y Victor ta cu e second pan, anto su ruman homber chikito Freddy ta toca e baho riba e barinan. A scoge pa un estilo general y esun mas facil ta canticanan manera

“My bonny is over the ocean”. Despues bo ta bay cu e wals, ya cu e ritmo ta hopi facil pa cuminsa cune, despues bo ta balia wals ora bo ta domina esey. Bo ta bay mas den otro ritmo, manera danza, mazurka, of bo por bay den balada. Bo por bay “comping” den tumba, pero bo mester sa con pa hacie tambe cu dos man. Mester un tiki mas training tambe pa esey. Victor a toca Jazz tambe despues cu el a bay Hulanda bay studia. Nan a forma un banda.

Desaroyo musical

Victor ta kere cu e motivacion pa toca un instrumento musical ta bin di cas. Manera diadomingo asina ta un “happening” tin na Savaneta. Tocamento tabata cu guitarra, riba piano y bo ta haya hendenan di Playa ta bin pariba, manera Eddy Toppenberg y Jossy Brokke. Tur ta bin pariba, pasobra tin ambiente aki y tur ta den veranda di cas tur diadomingo. Practicamente ta diadomingo semper tabatin musica, door cu Victor su tata tabata stima musica. Semper e tin

tin su guitarra den auto. Nan ta bay pasa diadomingo na kapel di Alto vista prome, ya cu su mama ta hopi devoto. Tabatin un orgel den kapel di Alto Vista, anto tin biaha Victor ta compana su mama di Savaneta pa Alto Vista. Pero e tempo ey, nan tin cu coy bus na Savaneta bin Playa, for di Playa bay Noord, di Noord bay Alto Vista. Ora tabatin nobena asina, ta tur dia Victor tabata baha abou bin bek. Su mama ta gusta canta, anto e ora e cuminsa canta, mes ora Victor ta bay riba orgel di pedal.



Victor Camacho su desaroya musical riba piano



Grupo Los Casiques

Pero no tin e orgel ey mas awor. Su mama no ta worry, misa por ta bashi of cu solamente algun hende. Kapel por tin djis un paar hende, nan ta toca y canta y esey a keda un hopi bunita recuerdo. Victor ta haya piano un instrumento asina completo, cu bo por coy bo melodia, bo harmonia y abo por toc'e manera bo ta desea cu diferente combinacion. Victor ta "chords melodia",

bisa por ehempel, e no ta coy chords den un forma di bisa bisa pero e ta coy mas movecion di bo man robes y e melodia di esey. Asina Victor a siña un tecnica, anto cu e ta haci'e tipico, manera cu e ta awor aki. Victor a scucha hopi musica clasico y otro tipo di musica, anto asina bo ta haya bo conocimiento musical ta bira mas amplio.

Participacion musical

Victor su participacion musical tabata cu masha hopi grupo mes activo den añanan 60 di siglo pasa. Prome cu Victor a toca piano, e tabata toca cuatro caba. Nan a lanta un grupo di aguinaldo na Savaneta. Su ruman muhe tabata dirigent. E grupo ta grandi cu cincuenta mucha di Savaneta ta canta. Su ruman homber chikito riba e tambora, nan ta tin furuco y Rafi tabata riba cuatro. Meda, kende ta su ruman muhe, ta canta bunita mes. Tambe Imelda kende ta biba na Hulanda

awo. Prome cu esey, nan tabatin Trio los Camachos. Den e trio aki Meda ta canta y Rafi cu Victor tabata riba cuatro. Despues di e trio ey, a bin e Aguinaldo. Mas despues a bin steelband, cu cua nan ta participa den parada di jump up na Savaneta. Prome cu Victor a bay Hulanda, nan a forma The Strangers. Despues Victor a yuda forma Dedhalavie. Mas despues el a bay Hulanda. Victor tabata toca cu un grupo di rock, imagina bo propio rock. Despues Victor a toca pa Coro



The Strangers 1964—2019



Grupo Aguinaldo di Savaneta

Canta Antiyas na Tilburg y nan a forma e banda Combo Pa-tin-pret. Ey Victor a siña toca avansa den su piano. El a bin bek Aruba y el a toca cu diferente hende, entre otro cu Jack Tromp, Franklin Sofia (Mecha) y cu Fay Luidens. Nan a toca na diferente hotel, despues Victor a toca cu Joy Kock na Concorde Hotel.




Combo Pa-tin-pret di Tilburg Hulanda



Victor Camacho a topa cu Jose Feliciano

Grabacion realisa

Victor a cuminsa cu grabacion na aña 1990. El a haci su prome produccion musical y a dedica esaki na Rufo Wever. E disco compacto yama Souvenir di Aruba. Como cu esey tabata un exito grandi, el a dicidi dos aña despues pa graba un segundo CD "Refleho di antaño". Riba esaki tin musica di Rufo, composicion di Victor mes tambe, Toty Arends y di Padu. Despues cu esaki tambe a bay hopi bon, Victor a graba un CD di Pasco. El a compone un cantica pa La Reina di su bishita basta tempo pasa, pero nunca el a public'e, pasobra e no a haya e chens. E ora ey, Victor tin e grabacion Bon Bini Famia Real, un wals. Tambe el a traha un cantica pa Savaneta cu yama Brisa di Savaneta. Victor tin un wals Stacey, un jazzwals y e tin diferente otro cantica mas. El a graba diferente danza, pero tur ta den pipeline ainda.



E parti internacional

Victor a bay representa Aruba na Bogota Colombia, Maracay Venezuela, Berlin e tempo ey tabata tin e West cu Oost Berlin, ainda nan no a basha e muraya di Berlin abou. El a toca na Hulanda, Corsou y Boneiro. Na Boneiro el a bay compaña Meybelline cu e coro, anto nan a participa na un contest di mucha.

Acontecimiento cu Victor ta considera mas importante den e bida artistico

Den e bida artistico semper bo tin cu zorg pa bo ta bon prepara, bo repertorio ta amplio, bo escogencia di bo canticanan y bo tecnica tambe bo tin cu practica. Train diariamente un bon repertorio. Tin biaha bo mester puntra e guestnan tambe, pasobra bo ta toca pa nan y bo mester puntra ta kico nan kier scucha. Asina nan ta traha un lista pa bo y percura pa train hopi bon, pa bo ta bon prepara pa bo concierto of presentacion.

Sugerencia pa futuro generacion

Victor ta stimula tur e muchanan cu kier sigui e direccion di musica pa bay un scol di musica. Bo tin cu train tur dia piano of cualkier otro instrument cu bo a scoge, bo tin cu dedica por lo menos mey ora of un ora. Dedicar na bo instrument pa bo sigui construi, pasobra bo ta cana cada etapa, cada seis luna, cada aña bo ta yega na un otro nivel. Asina bo ta desaroya bo mes. No bay bisa cu bo ta musico anto bo ta domina tanto instrument. E importante ta siña, e unico secreto ta practica, te ora bo por domina cierto tecnicanan, e ora bo por yama bo mes un musico. Cu otro palabra siña musica. E por ta na scol di musica Rufo Wever, e por ta online via internet mes tin hopi programa. Manera e les cu mi ta tuma, ta na casi mil hende e mester di California ta duna les. Na hende di casi tur parti di mundo, Mexico, Italia, Rusia tur e hendenan ey ta tuma les for di dje. Anto e ta motiva nan con pa studia. Mi conseho ta pa muchanan cu kier bira un bon musico mañan, pa bay un scol di musica of facie online. Bo sa cierto cos di musica, pero keda train, anto asina nos por haya gran musiconan tambe. Manera pa nos himno y bandera, mester di composicionnan y musiconan cu ta bale la pena.